

Turnir u rekreativnom malom nogometu

*



P R A V I L N I K

Originalan tekst Pravilnika iz 1982 g. - reprint 2009

* redizajn logotipa na osnovu izvorne ideje,
1982 – godina održavanja prvog turnira (11. Septembra 1982. – svaka sličnost
sa drugim događajima na ovaj dan je sasvim slučajna!)

TURNIR U REKREATIVNOM MALOM NOGOMETU „GARAGE XX“

P R A V I L N I K

DEFINICIJA TURNIRA

1

Tradicionalni turnir u rekreativnom nogometu „GARAGE XX“ se održava svake godine, druge subote u septembru, na platou ispred garaža kod solitera u ulici Bratstva Jedinstva br. 20, Zenica.

2

Turnir se MORA održavati na toj lokaciji.

3

Jedino izuzeće u odnosu na prethodni član je slučaj rušenja garaža. U tom slučaju Turnir se može premjestiti na drugu lokaciju ali mora zadržati ime „GARAGE“ i tada će njegov puni naziv glasiti: „Memorijalni turnir GARAGE xx“.

4

Pravo učešća na Turniru imaju oni koji su pozvani u statusu UČESNIKA.

5

Pravo prisustva Turniru imaju svi i dobro su došli.

6

Ekskluzivno pravo na status učesnika imaju vlasnici garaža.

7

Status punopravnih učesnika Turnira u smislu tačke 4. imaju oni koji su u periodu između 1968 -1975 godine aktivno učestvovali u sportskim nadmetanjima na kulturno-sportskom prostoru ispred Garaža, bez obzira kojoj strani su pripadali.

8

Ukoliko neko smatra da ima pravo na status učesnika, a prethodno nije ostvario to pravo, mora podnijeti molbu taksiranu sa dvije gajbe pive, navodeći argumente po kojima smatra da mu to pravo pripada.

Molba će mu biti uslišena ako je prihvati većina punopravnih učesnika turnira.

9

Punopravni učesnik koji dvije godine zaredom neopravdano odsustvuje sa turnira, trajno gubi status učesnika i biva proglašen „šupkom od garaža“.

FORMIRANJE TIMOVA

10

Na početku održavanja Turnira konstatuje se prisustvo učesnika – vrši se prozivka. Potom se pristupa izvlačenju ekipa, utvrđivanju načina takmičenja, izboru sudije i zapisničara i, čitanju ovog Pravilnika i polaganju svečane zakletve.

11

Ekipe broje po tri igrača.

12

Sastav ekipa se određuje izvlačenjem ceduljica prije početka turnira. Po tri cedulje sadrže iste oznake koje ne smiju biti vidljive. Oni koji izvuku iste oznake čine tim i s tim sastavom se moraju pomiriti.

13

Izuzeće u odnosu na prethodni član su ekstremne situacije kada se u istoj ekipi zadese Duranović i Srdanović, odnosno Grbić i Blažević. U tim slučajevima se izvlačenje ponavlja.

SUDIJA

14

Prije početka Turnira učesnici biraju sudiju koji može, ali ne mora, biti neko od punopravnih učesnika. Sudija mora biti čovjek od autoriteta i mora biti markantna ličnost. Poželjno je da ima brkove.

15

Sudija je uvijek u pravu.

16

Sudija ima apsolutno odriješene ruke.

17

Svaki prigovor na odluke sudije je NESHVATLJIV.

ZAPISNIČAR

18

Zapisničar mora imati minimum 4 razreda osnovne škole i mora unositi činjenično stanje.

TEREN

19

Granice terena – liniju auta čine: gornja ivica garaža (ako lopta ode preko garaža), travnjaci i ulica N. Pozderca.

20

Ukoliko lopta zaglavi ispod auta (misli se na automobil, uključivo i fiće) pripada onome ko je izvuče.

21

Aut se izvodi nogom.

LOPTA

22

Lopta mora biti obična, gumena prečnika između 150 – 250 mm.

23

Pritisak u lopti mora biti ravan atmosferskom, odnosno lopta ne smije skakati. Da bi se to postiglo lopta se mora probušiti neposredno prije početka Turnira.

24

Bušenje lopte je svečan čin.

GOLOVI

25

Golovi su određeni stativama u vidu kamenja.

26

Kamenje (stative) mora biti odgovarajućeg oblika i težine. U principu kamenje za golove mora biti teže od 1 kg i ne smije biti lakše od 0,5 kg, odnosno mora biti lakše od 10 kg i ne smije biti teži od 5 kg.

27

Gornja granica gola je zamišljena linija. Isključivo pravo zamišljanja te linije pripada sudiji.

28

Razmak stativa – veličina gola je relativna kategorija i to, kao i sve drugo, određuje sudija. Ukoliko prvo poluvrijeme prođe bez golova sudija ima pravo povećati golove objema ekipama. Takođe ako smatra da je jedna ekipa izrazito nadmoćna ima pravo toj ekipi povećati gol sa ciljem ispravljanja nepravde.

POSEBNE SITUACIJE

29

U slučaju vremenskih neprilika Turnir se ne odgađa. Jedino izuzeće od ovog stava je slučaj direktnog pogotka groma u teren.

30

U slučaju da se na terenu zadesi parkiran automobil koji predstavlja smetnju odigravanju turnira i obratno, a vlasnik istog je nedostupan, isti će se pažljivo pomjeriti na rukama do najbližeg bezbjednog mjesta.

31

U slučaju pričinjavanja bilo kakve štete tokom održavanja Turnira, štetu snose svi učesnici a sanira je ekipa čiji igrač je načinio štetu. Ova šteta se ima sanirati prije završetka Turnira.

32

U slučaju prekida turnira od strane Organa bezbjednosti, koji je neupućen o čemu se radi, ili je dezinformisan, treba se ponašati mirno i dostojanstveno. Zabranjuje se svaka diskusija sa dotičnim (posebno se odnosi na Prešu) a ako je neophodno Turnir se i prekida.

33

Nastavak Turnira prekinutog na način opisan u prethodnom članu će uslijediti nakon što Organ bezbjednosti zamakne iza ugla.

34

Takođe ako neko od komšija počne negodovati treba imati na umu da se radi o licu koje je tu doselilo u periodu između dva turnira i očito ne zna o čemu se radi. U tom slučaju će se odrediti ekipa koja će obaviti informativni razgovor sa dotičnom osobom te je upoznati o čemu se radi. Ova ekipa je ad-hok ali njen stalni član je Grbić Predrag.

PONAŠANJE NA TERENU

35

Ponašanje na i oko terena mora biti fino i u skladu sa ovim pravilnikom.

36

Za vrijeme održavanja Turnira učesnici ne smiju konzumirati alkohol.

37

Pod alkoholom u smislu prethodne tačke se ne smatra piva.

38

Ostale zabrane:

- Zabranjuje se neodmjereno GRLITI U LJUBITI prilikom postizanja gola;
- Još jedanput se zabranjuje svaki PRIGOVOR sudiji;
- Zabranjeno je UDALJAVATI se sa terena za vrijeme igre;
- Zabranjeno je DOBACIVATI komšinkama na balkonima i prozorima;
- Zabranjeno je igrati OBNAŽEN (odnosi se na Prešu);
- Zabranjeno je igrati BOS (takođe se odnosi na Prešu);
- Zabranjeno je driblati SAM SEBE (odnosi se na Jasenka);
- Zabranjeno je UTRČAVANJE na teren (odnosi se na one koji ne igraju u tom momentu);
- Zabranjeno je igrati DEFANZIVNO (stalno stajati na голу);
- Zabranjeno je NAPUCAVANJE slučajno ili namjerno prolaznika i osoba koje su svojim aktivnostima upućene na kontejner kraj terena;

Spisak zabrana nije konačan

ZNAMENJA I OBILJEŽJA TURNIRA

39

Znamenja Turnira su PRELAZNI PEHAR i MEDALJE.

40

Obilježje turnira je njegov LOGO koji karakteriše pet olimpijskih kvadrata – simbol pet garaža pred kojima se Turnir odigrava. Simbolički je prikazan i čin bušenja lopte. Logo turnira je prikazan na naslovnici ovog pravilnika.

41

Dizajn znamenja je utvrđen 1982 i ne smije se mijenjati. Prelazni pehar je ingeniozno rješenje koje se u najkraćem bazira na originalnoj boci VINJAKA CEZAR koja je postavljena naglavačke i pričvršćena za postolje. Takav njen položaj upravo čini oblik pehara, a njen sadržaj ujedno predstavlja dodatnu simboliku koju ne treba posebno objašnjavati. Evo kako ovo obilježje stvarno izgleda:



42

PRELAZNI PEHAR, kako mu ime kaže, je u vlasništvu pobjedničke ekipe do narednog turnira i ta ekipa je zadužena za njegovo čuvanje. Najstrože se zabranjuje ispijanje sadržine pehara i to će se, ako se desi, smatrati grubim sknavljenjem znamenja.

43

Izuzetno se može prekršiti prethodna tačka samo u slučaju ljute nevolje. Ali i u tom slučaju se sadržaj pehara mora nadomjestiti prije početka narednog turnira.

PRELAZNE I ZAVRŠNE ODREDBE

44

Ovaj Pravilnik se ima pročitati na početku svakog turnira a svi učesnici se zaklinju da će postupati u skladu njegovim odredbama.

45

Čitanje Pravilnika i Zakletva je svečan čin i time započinje turnir

46

Tekst svečane zakletve izgovara najstariji učesnik Turnira i on glasi:

„Tako mi časti i ovih garaža, zaklinjem se da ću se na turniru ponašati u duhu ovog pravilnika.“

(ovaj tekst se mora izgovoriti naglas, a zbog njegove kompleksnosti i moguće treme dopušteno ga je pročitati sa cedulje.)

Svi prisutni potom izgovaraju jedno od ponuđenih prikladnih uzvraćanja, prema vlastitom izboru:

- a) 'oću, 'oću;
- b) 'oću, svega mi na svijetu;
- c) 'oću garant, pas bio ako slag'o;

Izgovaranjem ove zakletve Turnir se smatra otvorenim.

* * * * *